

SANTIAGO NAAJIONEE

Santiago naajiosano niyaquejeno pueyacuara

1 ¹Janiyari Santiagoni, Pueyaso seru, Neyanu Jesucristo serujuhuj. Nia saruhuataanjia puetunu tiqiyocua jiyacajinijanaa niyaquejeno Israel doce niquiohuacuajinio caneno pueyanaa.

Niishitiaja Pueyasojiniji masesano

²Cuarta Pueyaso pueyanaa, shuquiriaa-tia nia quiriquia niaa jaara taraatia miishaare, niaa jaara naquiya miishaare-juhuj. ³Niaacujaari niishiya, niaa jaara Pueyasocua nia tiuuniucua saniniujiu-shaare, niaari socua juhuajaniya sashijacara quiniutianiya. Niaaraari naa miishaanutaniyaqui nia sashishacari Pueyaso cuaara puetunu maninijanaa miiria niaarajaatijia. ⁴Nia rejeretare seetanujanaa maninia sashijaca nia quiniuria, majaari quenaaja nia taacanuunu. Niaa jaara naa mijia quiriti, niaari maninia jeenucasano quiniutianiya, pueyaracaanu maninia mijia nia quiniuria.

⁵Tamonu niajanijajinijinio jaara niishiyaquiri taa na miiniutianiya, nojuaja cuaara Pueyaso maseera, Pueyaso na secojosacari. Pueyasoori na niishitiaja niquitionutaniya. Nojuajaari puetunu pueyajanaa niquitioquia, capora na quiniucua. Majaari na juaani niaa jaara na masere. ⁶Nia masesacari, seetanujanaa nia tiuuri Pueyasocua,

majaari quenaaja nia taacanuunu. Cante na masesacari taacanuujani, nojuajaari juhua paratu piyarojosano mohuaca, naatej, taa paratu tacarojiya mohuaca na piyarojosacaricuaani. ⁷Jiyano pueyanotej, Pueyasoori maja na masesano na niquitionu quiniutianiya, noojia niquijio-teja na quiniucua. ⁸Noojia niquijio-teja pueyanoori quiarijia maseya na panishano. Tariqui na secojosacari saniniujia, tamonu casaa maseyari, na paniyaquisha-cari coteenu na masesanocuaa. Jiyano pueyanoori noojia niquijio-teja pueyara-caanu. Majaari quenaaja na miini panishano na tucatanu quiniutianiya.

⁹Cua panishano Pueyaso muerasunaa, niaa jaara casamijiu quiri, naajaa, shuquiriaatia nia quiriquia. Pueyasocua-jaari nia jiyatequiaari na muerasura, na jiitiasanojiniji nia jiitianurajuhuj.

¹⁰Saniniujia, niaa jaara casamiriaca pueyano quiri, shuquiriaatia nia quiriquia Pueyaso jiyanooshano nia quishacari. Niaacujaari niishiya niaari tojetaarucua-janaa saniitiosocoriquiano quiquiaari juucua sesa mijia nia quiniucua tarijia. Casamiriaca pueyanoori seetanujanaa juhua naana shuu, majaari na rishiniu. Saaja rupaquijia niquishiya shanohuari.

¹¹Pananu jaara nasatia jama, neyonaari sorequee. Na shuuri tiqui. Shanohua niquishanoori shaajequeejuhuaj. Casamiriaca pueyanoori naajuhuj. Na casami niquitiojosacarijia na canijianura juucua, canashiyaquiji shaajenutanijajuhuj.

Naquiya pa miishacari

¹²Shuquiriaatia quijia cutaraari Pueyasoo-cua tiuujia, cante taraatia na miishacari rejeretaja saajani. Naa taraatia na saniniuju-shaanuucatej, nojuajaari juhua cutara jiyaniijia tuhuaja niqutiosaanutaniya, pueyaracaanu rishijia na quiniuria. Cunoori Pueyaso niqutionu panishano na panijiaa, taa na sequequiaaricujani. ¹³Niaa jaara sesa miiniucua jiaatiaa, majaari sequenu: “Pueyasoqui sesa cua miitiniu paniya”. Pueyasoori maja sesa mijia. ¿Pa Jiyaniijia-tucia casaara sesa miitiri pajaniyani? ¹⁴Saniniujia, tama poojia sequejaarijia pa shiniujuquiaa sesa pa miiniuria. Naajuhuj, tama pa niishitijajaarijia pa sapojoquiaa sesa pa panishano pa miiniuria. ¹⁵Naa sesa miiniucua pa jiaatiasacaritij, cunora paari sesa miiquiaani. Naa sesa mijia pa quishacaritij, paari cunora shaajasaanutaniyani.

¹⁶Cuarta Pueyaso pueyanaa, maja tama nia cuaqueyajaaja nia sapojonu. ¹⁷Puetunu maninia casaajanaa pa masesanoni, cunoori Pueyaso niqutiosano jiyocuacaanuji. Nojuajaari puetunu jiyocuacaanu pa niquishano casaajanaa shipinijioquiaari, mijiria pa cuhuatariquiano. Pueyasoori pueyaracaanu maninia quijia. Majaari na jatanu tamaatia na quiniuria, na cojuaaquiniuria pajaniya. ¹⁸Pueyasocujaari pa sohuanu samiitianijioquiaariuhua na rupaacua pa tiuushacari. Nojuajaari pa jiyatequiaari quiarinio na muerasu pa quiniuria. Naacuajitij, taa pueyano tutaacuaa na shuquiriniutia na saaco rishishacaricuani, Pueyasoori naa juhua pa tutaquiaari na shuquiriniutiajuhuaj, coteenujuanaa na jiyapueranuhua pa quiniucua. Nojuajaari tariucuaanujiniji naa pa riurioquiaaritij.

Seetanujanaa Pueyaso tojtijajaca

¹⁹Naacuajiti cua panishano cuarta Pueyaso pueyanaa, cua tojtitiare. Puetunu

niajaniyajanaa cuaara quiriia ritia tojjia, jacaria pocuaja. Cuaara quiriia shiniquiajuhuaj, maja ritia juaaja. ²⁰Pueyanoori maja na naata Pueyaso panishano miini na juaaniutia. ²¹Naaratej, nia cartere puetunu sacuaraatia nia miiniujianaa, puetunu sesa nia niishiriojosanojuanaa-nio. Nio pa quishacarini, puera sesa miiniuari quiquiaa. Naajuhuj pueyanaa, juhua maninia naatujua nia tojiri Pueyaso rupaa, taa nia niishitiojosaa-quiaaricujani. Majaari na ruuretanu. Pueyaso rupaacujaari cumaacaraca tojetaarucujanaa sesa miyashijiacara na jiyatenura pajaniya.

²²Pueyaso rupaa tojjijia nia quiri seetanujanaa. Majaari nia numaa shama nia tojtitanunoj. Niaa jaara Pueyaso rupaa tojijiaquiri, niaari tama nia cuaqueyajaaja sapojiya. ²³Pueyano jaara Pueyaso rupaa tojijiaa saaja na numaa shama, nojuajaari juhua noo pueyanojua, na jiquioco niquiri niqutiujinia narejaari. ²⁴Jaara tacateyarohua, na jiquioco niyajetaseequiohuari taamuecate na jiquioco quiriquiaani. ²⁵Pueyaso rootasanoori jiyanojua maninia, maja quenaaja sesa. Sesa miiniucua jiitinio pueyano jaara na tojjijia quiri, nojuajaari na naata sesa na miini tarinitianu. Cante na numaama na racatajani, nojuajaari shuquiriaatia quijia quiniutianiya cutara. Puetunu na mishanojuanaari maninia quiniutianiya pueyaracaanujuhuj.

²⁶Cante na niti rejeteyashijiani, nojuaja jaara tama na cuaqueyajaaja jiyaniya: “Janiya cutaraari Pueyaso tojjijiani”, cunoori tama na cuaqueya sapojiyajaacujua. Saaja sacuaraatia pocuaja quiya pueyaracaanuuri. Nojuajaari najuhua Pueyaso rupaa tojjia. ²⁷Cante seetanujanaa pa Que Pueyaso rupaa tojjiani, nojuaja cuaara japueyojuaca niqiniucua rucaneera, nojori na naacunura. Cuaara naa miiria mashiquiopuerajuhuj,

nojori taraajenucujusacari nojori na cumanijianura. Naajuhua, cuaara tama na cuaqueyajaaja cojuara, narta pueya na miyaquiniucuaaji sesa. Naa mijia pueyanotej, nojuajaari Pueyaso pueyano cutara.

Maja cumaati rimiajata pa paniniu pueya

2 ¹Cuarta Pueyaso pueyanaa, pa Jiyaniijia Jesucristoori shacantuca cumaacajinia quijia. Nojuacuajaari tojetaarucujanaa maninia quijia. Nocua tiuujia nia quishacari, majaari rimiajata nia niqiniu tamasaca. ¿Pa Jiyaniijiateeri pa sooquiaaricuaa, ninishiqui quijia pa quishacarijiani? Maja. ²Cunora cua sequesanojinia nia niishiriojore: casamiriaca pueyano jaara nia secojonuujua tiajinia tiuquimia, maniniuqui toqueraca, jaanishoracajuhua, ¿ta nia miiniutianiyani? ³Niaari naa sequeja: “Niya quia cajishii pueyanaa, cajitii maniniujiniani”. Saniniuujia, toqueeju pueyano jaara jiyacari tiuquimijuhua, jiyareta curuutuquena-niyojua, niaari na sequereecujua: “Cuniquijia quia nujuare”. Casaa maaraja: “Cuniquijia quia cajiri quiaa tii nujuaani”. ⁴Niaa jaara naa miiritij, niaari tama nia cuaqueyajaaja jiyateree juhua niarta pueya nequesoreenara. Niaari casamiriaca pueyano jiyaniya nojuaja naasucua socua maninia pueyano casamijiu pueyanojiniji. Naaratej, niaari casamiriaca pueyano shuquiritiniu panijia.

⁵Cua tojitiare cuarta Pueyaso pueyanaa, ¿majateeri nia niishiniu, Pueyasocuaajaari casamijiuiniucua pueya saquiriojoquiaari nocua tiuujia nojori quiniuria? Nocua tiuujia nojori quishacari, nojoriirijuhua jiyanojua casamiriaca Pueyasora. Naajuhua, Pueyasoori nojori jiyatenutaniya jiyaniijianucua nojori quiniuria, puetunu

Pueyaso jiitiasanojuanaa nojori jiitianura. Naa miiniutianiya na panijiaaari taa na sequequiaari seetanujuanaacujani.

⁶Niajanियarijataj, niaari nojori cararojo-quiaacujua. ¿Majateeri nia niishiniujuhua, cuno casamiriaca pueyacuajaari nia nohuasejoquiaa na sajonota? Nojoriirijia nia jaamitiquiaa nequesoreenaacua, niaacuara na saquiriojotanura. Nojoriirijia nia miitiquiaaqui nia jiitiasano casaaniyojua na jaariutianura puetunujuanaa. ⁷¿Majateeri nia niishiniu, nojoricuajaari pa shuquiritiasano Jiyaniijia sesacajuhua? Pa Jiyaniijia sesa jiyaniquitiuciaa na soonutaari.

⁸Puetunu Pueyaso rootasanojinijia-naani, nioori socua tojishocoriquiano. Naa naajiotasano quiyari:

“Pueya nia paniri taa nia paniya tama nia cuaqueyacuani”.

Pueyanaa, niaa jaara cuno rootasano mijia quiriquia, niaacuajaari maninia mijia. ⁹Saniniuujia, niaa jaara rimiajata paniri pueya, niaari sesa miya. Niaari saniitiosocoriquiano, Pueyaso niishitiojono tojiyashijia nia quiniucua.

¹⁰Pueyano jaara puetunu Pueyaso rootasanojuanaa tojiquiaa maninia, saniniuujia, jaara niquiriyatu cuno rootasanojiniji tojiyashijia quiri, cuno pueyanocuaajaari Pueyaso tojiyashijia. ¹¹Pueyasojuaacuaajaari sequequiaari: “Maja nia camishoo maaji nia numuetucunu”. Sequequiaarijiaariuhua: “Maja monu”. Naacujitij, pueyano jaara na camishoo maaji numuetuqueyquijia quiri, saniniuujia narta pueyano moyari, cuno pueyanoori Pueyaso rootasano tojiyashijiajuhua. ¹²Niaa cumaati niishiya, Pueyasoori na muerasu nequesoreenutaniya taa nojori tojtiaquiaari na rootasanocujani. Nocujia tama pa cuaqueyajaaja pa cojuare taa pa miiquiaani, taa pa pocuquiaani. Nia

niishiri, paari nequesoreesaanutaniya pa miishanojinijini, taa pa miiquiaari parta pueyani. Cante pueya panijia quiyani taa Pueyaso rootaquiaaricujani, nojoriiri jiyanooshaanutaniya taa nojori jiyanoo- quiaaricuaa tamasacani. ¹³Saniniuujia, canapue te narta pueyano jiyanyashijia- ca quiquiaarini, Pueyaso nequesoreenu juuca puetunu pueyajanaa, nojoriiri jiyanyoquishaanutaniyajuhaaj. Canapue te jiyanoojia cutarani, nojoriiri jiyanooshaanutaniya cutara, taa tamasaca nojori jiyanooquiaacuaani. Nojoriiri shuquiriaatia quiriquiano cuno juuca, Pueyaso nequesoreesacari nojori.

Pueyasocua tiuujiaacari maninia miijiaca

¹⁴Cuarta Pueyaso pueyanaa, ¿maniniate pueyano jaara sequere: “Janiyacuaajaari Pueyasocua tiuujiani”, nojuaja jaara maninia miyashijia quiyajaa? Nojuaja jaara maninia miijiara jatanishoo quiyajaa, najuhuaana sequeri: “Pueya- socua tiuujianijia”. ¹⁵Naacujitij, tamonu parta Pueyaso pueyano jaara pa sequesee: “Maja cua jiitianu toque. Maja quenaaja cua miaquesocoriquiano cua jiitianujuhaaj”, ¿taa pa miyani? ¹⁶¿Mani- niateeri paa jaara na sequereni: “Juhuaajaniya quia quiaarohua. Quia miaquesuhua. Toque quia cushishuhaju- huaj”? Maja. Paa jaara quenaaja na niquitioyaquiri na panishanoni, pa sequesanoori najuhuanaj. ¹⁷Naajuhuaaj, pueyano jaara sequere: “Jesucristoocua tiuujianijia”, jaara seetanujanaa Pueyaso rootasano tojiyaquiri, na sequesanoori najuhuanajuhuaaj. Jiyano pueyanoori maja seetanujanaa Jesuucua tiuujia. Paa jaara seetanujanaa Jesuucua tiuujia quirini, pocua maninia miijiaca quirijihuaj. Maninia miyashijiaari maja seetanujanaa Pueyasocua tiuujia.

¹⁸Pueyano jaara tamonu sequeriquia: “Quiaari sequeya quiaa Jesuucua tiuujia

cutara. Janiyari saniniuujia maninia miijiiani. ¿Taa cua niishiniutianiyani quiaari seetanujanaa Jesuucua tiuujia, quiaa jaara maninia miyaquiri? Maja cua naata na niishiniu. Janiya cutaraari quia niishitiniutianiyani janiyari seetanujanaa Jesuucua tiuujia cutarani, maninia cua miishacari”. ¹⁹Pueyaso Rupaacua quia tiuuniuucua, quiaari niishiyacuaja Pueyasoori Jiyaniijajanaa. Cuno quia tiuuniuuri maniniacuaja. Naajaa, nia niishiri, samaruhuari cuno niishiyajuhaaj. Na puerenuta nocuaji tetcatiyuari.

²⁰Mosanucuaanaa, ¿majateeri nia niishiniu? Jesuucua tiuujia nia quishacari, niaa jaara maninia miyashi- jiaca quiyajaa, Jesuucua nia tiuuniuuri najuhuanaj, nia tojiyaquishacari Pueyaso.

²¹Niaacuajaari niishiya taa Pueyaso saniquiaari pa supuetana Abrahamni, na niishiniuria seetanujanaa nocua tiuujiatee. Pueyasoori naa na saniquiaari: na sequequiaari: “Abrahamnaa, quia niyanuniyoyua quia more cucuara quia catijiasocoriquiano”. Majaari Abraham* ruuretanu quiquiaari Pueyaso sequesano nojuaja. Naaratej, Pueyasoori naa sequequiaari: “Jiyanohua maninia Abraham, cua tojiija cutara”. ²²Naacujitij cuarta Pueyaso pueyanaa, naa Abraham tojinuucua Pueyasotej, paari maatia niishiyani nojuajaari seetanujanaa Pueyasocua tiuujia quiquiaari. Naajuhuaaj, Pueyaso sequesano na miishacari, nojuajaari Pueyasocua tiuujia quiquiaari tojetaarucujanaa. ²³Naa Abraham miiniuucuatej, nojuajaari tariucuacaanu Pueyaso rupaajinia nojuajiniji naajiotasano tohuateequiaari. Naa sequeri:

“Abrahamri Pueyasocua tiuuiquiaari.

Naa na tiuuniuucua Pueyasocua- tej, Pueyasoori na jiyatequiaari juhua tojetaarucujanaa sesa miyashijia na quiniuria”.

Naa Abraham quiniuucua Pueyaso tojijiatej, nojuajaari sequesaaquiaari Pueyaso rupuenata.

²⁴Naacuajiti pueyanaa, Pueyasocuaajaari na sequesano mijia jiyanoquiaa. Maja cutaraari na jiyanooni noo pojori, nocua tiuuniu sequeja najuhuanatej. ²⁵¿Niaate niishiyajuhuaaj taa Pueyaso jiyanoquiaari Jericó tiacajinijinio paanatucuaani, nooj, Rahab jiyanishanotej? Pueyasoori na jiyanoquiaari neyatu na quiniuriajuhuaaj. Na jiyanoquiaariiri maninia na miiniuucua caapiqui pueyano Israel pueyajinijinio. Rahabri cuno pueya jamojoquiaari na tiaco. Na nuhuaji, nojori mashiquiaariuhua tamocoori, narta Jericó tiacajinijinio pueya puecoya-quiniuucuaaji cuno pojori. Rahabri naa maninia miiquiaariti jiyasojiniji na tojishanoocua na tiushacari. Niishiquiaariiri Pueyasoori Israel pueya cumaquinia quiquiaari. ²⁶Nio pohuatasa-noori pa niishitiojiya, naatej, taa pa cuaqueya macu quiya sohuauujucuaani, naajuhuaaj, paa jaara Pueyaso sequesano miyashijia quirini, paari najuhuaana sequeyani: “Jesuucua tiuujianijia”.

Pa niti juhua mani

3 ¹Cuarta Pueyaso pueyanaa, maja cumaati puera niajanijianijinio jiaatianu Pueyaso rupaa niishitiojanaa nia quiniuria. Niaacuajaari niishiya, Pueyaso rupaa niishitiojanaari socua jiyanhua saniitiosaanutaniya tamasacajiniji, nojori tojtiaaquiniuucua tama nojori niishitiojosanojuaaja. ²Puetunu pajaniyajanaari sequeyarucua miiquiaa sesani. ¿Teyano pueyanote tojetaarucua-janaa narta pueyano najiquitiyaquijia na pocuasacari? Shaaqui. Pueyano sequesano jaara puetunu maninijanaa quiri pueyaracaanu, cuno pueyano maara seetanujanaa maninia pueyano quiri cutara. Cuno pueyano maara na naata

puetunu tama na cuaqueyajaaja jiitianu niishiriqiajuhua sesa na miyaquiniuucuaaji. ³Niaacuajaari nishiya, caballo rupaama jaara niasaare na niquitijiotaja, na camaru na tojinuria, na netesacari, na camaruuri puetunu na caballo cuaqueyajanaa niquitijiotaa na panishaco.

⁴Puereetuca buqueeri naajuhuaaj. Shiitaniyojua na niquitijiotaja jiitiaajariuhuaaj. Jiyanhua paratu piyarojosacari, naajaa, na camaruuri saa cunotaja na niquitijiotaa na panishaco. ⁵Pa nitiiri naajuhuaaj, shiitaniyojua casaaniyojuaari pa cuaqueyajinia shipinishano. Naajaa, jiyanhua pocuanu niishijiaari. Sesa pa miitiyari. Nojuajaari juhua maniyashi. Maniyashi jaara jaare puereetuca cuhuariquiania, cuno maniyashiiri puereetuca maniria pacusee. Cuhuariquiaari puetunu catemaajanaa. Pa nitiiri naajuhuaaj. ⁶Pa nitiiri seetanujanaa juhua mani quiya pa cuaqueyajinia. Paa jaara sesa pocuareni, paari puetunu pa cuaqueyajanaa sesoyani. Pa nitiiri puetunu sesa niishijajanaa. Paa jaara sesa pocuare pueya niquiarani, puetunu pueyajanaari pa sequesano caminiujuquiaa tamasaca niquiara. Pa nitiiri Sesaaca poonijotesano. Naacuajitij, sesa pa pocuasacari, paari puetunu mijiria pa quiniujanaa sesoquiaani. ⁷Pueyanoori na naata jiyartuutenu puetunu casaajanaa: jaacuatujuaa, roshiyocuatujuaajuhuaaj, moojinijinio casaanio. Seetanujanaari, pueyari tari naa na jiyartuutejoquiaa. ⁸Maja cutaraari pa naata jiyartuutenu pa niti seque, saa maninia pa pocuanuraja. Pueyaracaanu sesa taquiriocuaa saajaari. Nocua quiyari juhua soconu noonacu, puetunu pueyajanaa na sesonura. ⁹Paari jiyano pa nititaja pa Que Pueyaso maninihuaqueetaquiaani. Naajuhuaaj, paari Pueyaso shipinishano parta pueya sesacaquiaa natajuhuaaj. ¹⁰Naacuajitij, pa rupaamaji tohuataari maninia sequesano,

sacuaraatia sequesanojuhuaj. Cuarta Pueyaso pueyanaa, imaja cumaati naa pa quiniutij! Maja maninia naatej. ¹¹Samo nacajiniji pueyaracaanu pacaretajaari shocuanacu mohuaca. ¿Jataquiaate soj? ¿Pianacuta saniniuujia pacaretaquiaacujua? Maja. Samo nacaari pueyaracaanu maniniuniacu quijia. ¹²Cuarta Pueyaso pueyanaa, ¿mariyajate na naata muetunu shucuenajara? ¿Nateecate sacamanajara muetujuajuhuaj? Maja. Naajuhuaj, maja pa naata pianacu mohuaca taquitianu cuari maniniujiniji. ¿Mohuacatucua casaara jatara tamaatiuniacurani? Naajuhuaj, paa cuara pueyaracaanu maninia pocuara saaja. Maja cumaati pa pocuasano pa cojitiniu sesa pocuasanota.

Niishijia pueyano

¹³Tamonu niajanijajinijinio jaara niishijia quiri, nojuaja cuara juhuajaniya maninia miiijia quiri nareja, maja pueya shocoteja. Jaara naa maninia quijia quiri, pueyari niishiniutianiya nojuaja seetanujuanaa niishijia.

¹⁴Saniniuujia, nioojia jaara najiquitishano quiri, niishijia nia quiaquiniuucua juhua niarta Pueyaso pueyano, niaari seetanujuanaa mosanucua. Naajuhuaj, nia miishano jaara quiri nia shocotanura niarta Pueyaso pueya saaja shuquiriaatia nia quiniuria tamajaaja, majaari nia jiyaniinu niaari niishijiaca. Naa miijiaca nia quishacaritij, niaa jaara tama nia niishitijajaaja shuquiritiare, niaari mosanucua saaja. Nia sequesacari: “Niishijia cutaranijia”, niaari sapojiya.

¹⁵Cuno nia niishitijaari maja jiyocuacaanuji Pueyaso niishitija. Cuno niishitijaari tama nia niishishanojuajaaja, mijiria niishishanojuhuaj, Sesaacajanaa niishishanonio. ¹⁶Pueyanaa, tee Pueyaso pueya juaatishano quiaa tamasa jaara na shocotare, naajuhuaj, pueya miishacari saaja tama na panishanojuajaaja, tii

quiyari juayonuujutanu, puetunu sesa miiniujianaanio. ¹⁷Saniniuujia, cante Pueyaso niishitija jiiitaa cutarani, nojuajaari maninia miiijia pueyano cutara. Jiyano pueyanoori maninia quijia puetunu pueya niqiarajanaa, jiyanoootio, jacaria pocuaja. Majaari na niishiniu ritia juaaniu. Pueyacuara taraajejaari. Majaari na niishiniu cuaracashijionu pueyacuara. Pueyaracaanu seetanujuanaa sequeyari. ¹⁸Naajuhuaj, cante juaatoyano jiyanoootiootejani, nojuajaari jiyanoohua shuquiriaatia quiniutianiya Pueyaso shuquiritishacari nojuaja maninia na miiniuucua.

Mijiria casaacua jiaatijacajiniji pohuatasano

4 ¹¿Niaate niishiya casaara nia juayonuujutaquiaa tamajaaja pueyaracaanuni? Niaari naa quiaquij sesa miiniuucua nia jiaatiasacari. Nioojiaari najiquitishano quiquiaa nia panishanoocua nia jiaatiasacari sacuaraatia. ²Naaratej, nia panishano nia maseyaquishacari, niaari na casamiicuaji pueyano moquiaa. Niaari naa miiquiaa puera nia jiaatiasacari nia panishanoocuatej. Nia panishanoocua nia jiaatiasacari jiyanoohua, niaari cunora miriyojotaquiaa. iNiaari socua piyotaariquiaaqij! Niaari naa quiaqui Pueyaso nia secojiaquiniuucua nojuaja niqitio-nura niajaninya nia panishano.

³Naajuhuaj, niaa jaara na secojore, majaari nia masenu quiquiaa nia masesano. ¿Casaara nia maseyaquiquiaanoj? Nia sequereeraj. Niaari sesa nia jiaatianuta na masequiaajuhuanajaj. Niaari nia jiaatiasanoocua masequiaa juucua, tama nia cuaqueyajaaja nia shuquiritiniuria.

⁴iPueyanaa, niaaqui Pueyaso rootasano ruuretajacajuhuanajaj! ¿Majateeri nia niishiniu? Cante mijiria sesa miijiaca miishano timitiajacani, nojuajaari

Pueyaso paracara quirii. Niaa jaara naa miijiaca quiniu paniyajuhuaaj, niaari tari Pueyaso paracara quirii. ⁵Tariucuaaanu Pueyaso Rupaaajinia naa naajiotasanoori quiyakuqij:

“Pueyasoori na Sohuanu niaquiaari poojiajinia, nera na cojuanura pajaniya. Jiyanoehua na paniniutia pajaniya, Pueyaso Sohuanuuri pa jamuequiaa juucua saaja Pueyaso- ra pa quiniuria”.

⁶Naajuhuaaj, Pueyasojuanaari jiyanoehua maninia naacucuaiaa pajaniya, jiyanoootio na quiniucua. Na Rupaaajiniaari naa naajiotasano quiyajuhuaaj:

“Pueyasoori noo pueya paracaajia, narta pueyajiniji juhua socua cutara pueyano quiniu panijiatej. Saniniuuja noo pojori maniniu- cuaarijia, naa sequejacatej: ‘Maja cua naata miiniu maninia tamajaa- ja. Pueyaso cuaara cua naacuura’”.

⁷Naarate pueyanaa, seetanujuanaa Pueyaso tojtiajacara nia quiriqia. Cumaatia nia nujuatare Sesaaca, maja na shocotanura niajaniya. Niaa jaara naa miiritij, niaacuaji mashiniutianiyari.

⁸Niaa jaara Pueyaso rupuere, Pueyasoori nia rupenutaniyajuhuaaj. Sesa miijiaca- naa, cua tojtiaare. Taa curuutucojuanucua shuquirioyacuaani, naa tama nia cuaque- yajaaja nia jeequejorejuhuaa sesa nia miishanojiniji. Noojiaqueya Pueyaso panijiaaari mijiria sesa miishano paniquiaajuhuaaj. Cuno pueya cuaara noojia jeequejoora maja socua noojia na niquijiotenura najuhuanaj. Cuaara saaja Pueyaso panijiacara qiiiria cutara. ⁹Sesa nia miiniucua nia nujuquette, nia taraajerejuhuaaj. Nia sapiyonuure. Sesa miishano nia saroojotanu nia jataniri namijiaacatenucua. Sesa miiniujiniji nia shuquiriniu nia jataniri taraajenuucuaaju- huaaj. ¹⁰Niaa jaara nioojiajinia sequeriquia Pueyaso niquiara: “Maja cua

naata tamajaaja maninia miiniu”, Pueyasoori nia naacutaa maninia nia quiniuria mijiria. Nojuajaari nia jiyatenu- taniya jiyaniijianucua nia quiniuria.

Parta Pueyaso pueyacuara rimiaaqueyashijiaca pa quiriqiaaj

¹¹Pueyanaa, maja sacuaaraatia nia rimiaaquenu niarta Pueyaso pueyacuara. Maja maninia naatej. Cante narta Pueyaso pueya sesacaani, Pueyaso Rupaaajinia naajiotasano tojiyashijiari jiyanotej. Niaa jaara naa miiritij, niaari Pueyaso Rupaaajinia naajiotasano sesaca. Naajuhuaaj, niaari tama nia cuaqueyajaaja jiyateya juhua jiyaniijiaara, niarta pueya nequesoreenaa nia quiniuria. Naa nia miishacaritij, niaari Pueyaso rupaa tojiyashijiacara quiquii. ¹²Pueyasojuanaa- ri tamajaaja Jiyaniijiajanaa.

Nojuacuajaari na rootasano niishitijia pajaniya. Nojuajaari niquiriyatujua pa nequesoreena, pa saniniujiuriquianoju- huaaj. Nojuajaari cumaacaraca pocuaji na tacunura, na shaajanura pajaniyajuhuaaj. ¿Canteeri quiajaniyanijia, quia saniniujiu- niuria tamasaca, juhua nojori jiyaniijiani?

Majaari pa niishiniu tariquiria

¹³Pueyari naa sequejaca: “Canaari tariqui quianutaniya tamonu tiacajiniani. Canaari cuniqui shocotenutaniya niquiriyatu marijiani canaa niquitiojosa- cari tii canaa casami. Canaari queraatia cumaneeca masenutaniya canaa casami samini”. Cua tojtiaare naa sequejacanaa. ¹⁴Majaari nia niishiniu taa nia juhuaque- nutaniyani. ¿Niaatucua taa sequereni niaa jaara macu juhuaquema saaja? Nocuaji majaari naa sequenute pueyanaa. Pa quiniuuri juhua shushiquiani. Naatej, taa shushiquiacuaani rupaquijia niquishi- yari, na nuhuaji tajimiohuari, paari naajuhuaaj. ¹⁵Naaratej, naa nia sequere

cutara: “Pueyaso jaara paniri, canaari tariqui quianutaniya poonijionuucuaní”. Naa cutarate maninia sequenu. ¹⁶Niaari saniniuujia sequequiaacujua: “Janiyari tariqui quianutaniyani cua miiniu panishano cua miiniuria”. Naa nia sequesacaritij, niaari jiyaniya nia naata tamajaaja miiniu puetunu nia panishanojuanaa. Naa nia sequesacari juhua nia miishocoriquianotej, niaari najuhuana nia rupaa riutioconeetequiaa puera, juhua niishijia pueyano. Naa jaara tama nia cuaqueyajaaja naa jiyateya juhua tariqui miishocoriquiano niishijiatej, cunoori jiyanhua sesa. ¹⁷Naajuhua pueyanaa, niaa jaara maninia miyaquiri, maninia miiniu niishijia nia quishacari, niaari tari sesa miijiaca.

Casamiriaca pueya nacasusaanu

5 ¹Nia tojitiare, casamiriaca pueyanaa. iJuhucarijia nia sapuere! iNia sariyocuate! iNiaari naquiya miiniutianiya taraatia! ²Niaari jiyanhua casamiriaca. Cuno nia jiitiasano casamini, najuhuana moqueyari. Surequeyari nia maniniuquiya toqueya miaqueyajuhua. Naacuajitij, puetunu nia jiitiasanojuanaari moquenutaniya. ³Nia paatijiosano oroni, nia cumaneecanio, najuhuana tiyarashiyari. Naacuajitij, pa Nequesoreenaari maatia niishiniutianiya niaari sacuraatia jamuejaca quiquiaari. Naa miijiaca nia quiniuucuatej, niaari saniitiosaanutaniya. Naaari socua shaajasaanutaniyaquij. Naaari najuhuana queraatia casami paatijia shuquiriaatia nia quiniuria tamajaaja mijiria. Saniniuujia, nio pa quishacariiri quera pa Jiyaniijia tiuquishacariuhua na saniniujiuniuria pajaniya. ⁴iJiyaniijiajanaari nia poonijjotesano pueya tojiquiaa! Nojoriiri sariyocuatuiya nia cumaneecajiniji nia niqutioyaquiniuucua nojori poonijionuunujiniji, niaara na senoonuucua

nataacuaca nia cuhuariquiajiniji. ⁵Mijiria nia quishacarijia, niaari shuquiriaatia quiquiaa puetunu nia panishanojuanaa nia jiitiasacari. Naa shuquiriaatia nia quishacaritij, niaari juhuajaniya shiyoshiya juhua puecosocoriquiano cushiya. Naaari nia miishaanutaniyajuhua. ⁶Niaari maninia miijiaca puecooquiaa. Majaari nojori nujuatanu quiquiaa najaniya, nocuara nia tonjusacari nia cuaracashiniutia najuhuanaj. Naacuajiti casamiriaca pueyanaa, niaa cumaati puetunu nio niaara sequesanojuanaa tojitiaa.

Juhujaniya pa sashiri pa Jiyaniijia

⁷Naacuajiti cuarta Pueyaso pueyanaa, juhuajaniya nia sashiri pa Jiyaniijia cuaara tiuquihuara. Cuhuariquia camaruari na natanu nuhaji naa sashiquiaa marujuhua, maninia na natau moritianura. Maru sashiyajaariuhua cuaara niiria, na natau jajau na querajaa-caatiniuria. ⁸Naa nia sashirijuhua. Majaari pa Jiyaniijiaacuaji nia pishiniu. Nojuacuajaari quera tiuquiniutianihua. ⁹Cuarta Pueyaso pueyanaa, majaari niarta pueyacuara nia rimiaaquenu nojori nia soonuta, niaa mariqui saniitiosaareeri. Naa niishiri, pa saniniujiunia Pueyasoori pocua catecanoya. Tari juhua pa tohuatayaji nujuuari. Nojuajaari seetanujuanaa pa saniniujiunia cutara. Nocuaji maninia pa quirij. ¹⁰Pueyanaa, juhuajaniya pa rejeretarejuhuaj, paa jaara naquiya miishaareni. Naatej, taa tariucuacaanu Pueyaso sequesano caminiujiuniaa rejeretacoquiaari taraatia nojori miishacaricuani, naa nia rejeretarejuhuaj. ¹¹Paari niishiyacuajani, Pueyasoori naquiya miiniu rejeretajaca pueya shuquiritaja. Maninia na miiniutaniyani. Naaacuajaari tari pohuatasaaquiaarijuhuaj taa supuetana Job rejeretaquiaari naquiya na miishaca-

ricuaani. Na nuhuaji cutara, Pueyasoori jiyanohua maninia na miiquiaariuhua, jiyanohua pueyacia taraajeja na quiniuu-cua, jiyanoojiaariuhua.

¹²Cuarta Pueyaso pueyanaa, nia tojitiare. Nia pocoojosacari, tamonu jaara quia sequesanoocua tiuyaquiri, naajaa, majaari najuhuana sesa pocuanu. Maja cutaraari sequenu: “Cua sequesanoori seetanujuanaa juhua jiya cajiniocuaja. Majaari na shaajenu quiniutianiya”. Majaari sequenujuhuaj: “Cua sequesanoori juhua nio jiya. Majaari na shaajenu quiniutianiya”. Majaari naa pocuanu sacuaaraatiej. Nia sequesano jaara seetanujuanaa quiri, nareja nia sequere: “Taaquiririni”. Naajuhuaj, nia sequesano jaara quiri “maja”, cuaara naa quiri seetanujuanaa. Majaari nia sequesano nia maatenu socua, Pueyaso mariqui nia saniitioreeri.

¹³Tamonu nijaniyajinijinio jaara naquiya miishiya, nojuaja cuaara Pueyaso secojoora. Shuquiriaatia nia quishacari saniniuuja, Pueyasora nia jaaquequejore. ¹⁴Cusosu nia quishacari, Pueyaso pueya jiitianaa nia sequere nojori cuaara secojoora niaacuara. Nojori cuaara shiyocua cojuata cusosu quiaara, pa Jiyanijia sesajinia nojori secojosacari. ¹⁵Nia secojosacari Pueyaso seetanujuanaa nocua nia tiuuniutia, cusosuuri naatanutaniuhua. Nojuaja jaara sesa miiquianu, Pueyasoori na jiyanooniutianiya sesa na miishanojiniji.

¹⁶Cunora, sesa nia miiniu nia sequetoore nia jiyanooshaanura. Majaari sesa nia miishano nia seetanu. Na nuhuaji Pueyaso nia secojore tama niaacuaraaja. Pueyasocua nia naatanijiorohua.

Maninia pueyano secojosacari jiyanohua, cunoori jiyanohua cumaacara. Pueyasoori na secojosano tojijia.

¹⁷Tariucuacaanu pueyara Pueyaso sequesano caminiujunia Elfasni, nojuajaari nareja pueyano quiquiaarijuhuaj taa pajaniyacuaani. Naajaa, nojuaja jaara Pueyaso secojoquiaari maja maru niniuria, majaari maru niniu quiquiaari jiuujianaraca marija cuaara shocojoquiaarijiaatijia, socua seis racanio. Majaari maru niniu quiquiaari tojetaarucujanaa. ¹⁸Elías jaara pacutequiaariuhua secojonu maru na panishacari, maruuri shusha niquiaariuhua. Pueya nataacuacaari jiyacari shusha moritiaquiaariuhua.

¹⁹Cuarta Pueyaso pueyanaa, tamonu nijaniyajinijinio jaara Pueyaso rootasano tojiyashijiara quiriohua, tamasa jaara na niquiri, cuaara na rootaaranoj, maninia miihia na quiniuhua. ²⁰Nia niishiri, cante sesa miihia tacatorohua Pueyasocua sesa na miiniuujinijini, nojuajaari cuno sesa miihiaacuaji tacuya maja senota na shaajasaanura. Pueyaso na jiyanootiya-jariuhua puetunu sesa na miishanojinijianaa. Tariucuaja cua panishano pueyanaa.